



Visoka škola za turizam i menadžment
Varda 1, Društveni dom
88 400 Konjic, Bosna i Hercegovina
Tel.: +387 36 727 330
Fax: +387 36 727 330
info@vstim-konjic.ba
www.vstim-konjic.ba

**PRAVILNIK O OCJENJIVANJU STUDENATA DODIPLOMSKOG STUDIJA
VISOKE ŠKOLE ZA TURIZAM I MENADŽMENT KONJIC UNUTAR
EVROPSKOG SISTEMA PRENOSA BODOVA (ECTS)**

Konjic, februar 2015.

Na osnovu člana 54. Zakona o visokom obrazovanju (Narodne novine br 4/12), i članova 14. i 137. Statuta Visoke škole za turizam i menadžment Konjic, Senat na sjednici održanoj 16.02.2015. godine donosi:

**PRAVILNIK O OCJENJIVANJU STUDENATA DODIPLOMSKOG STUDIJA
VISOKE ŠKOLE ZA TURIZAM I MENADŽMENT KONJIC UNUTAR
EVROPSKOG SISTEMA PRENOSA BODOVA (ECTS)**

Član 1.

Ocjenjivanje i vrednovanje rada studenata

1. Rad studenata na predmetu prati se, vrednuje i ocjenjuje tokom nastave in a dva redovna i dva popravna ispitna roka završnog ispita, u skladu sa studijskim programom.
2. Za predmete odslušane u zimskom dva redovna roka održavaju se u zimskom ispitnom roku, a za predmete održane u ljetnom semestru dva redovna roka održavaju se u ljetnom ispitnom roku. Sve nepoložene predmete iz zimskog i ljetnog semestra moguće je polagati na dva roka tokom jesenjeg popravnog ispitnog roka.
3. Vanredni studenti i student studija na daljinu obavezni su prisustvovati oblicima provjere znanja kako je predviđeno u silabusima predmeta, a iste se u pravilu obavljaju tokom radnih sedmica u kojima se organizuje nastava i nastava za ove studente. Vanredni student uz dozvolu nastavnika mogu prisustvovati svim oblicima provjere znanja sa redovnim studentima.
4. Ocjenjivanje studenata temelji se na primjeni Evropskog sistema prenosa bodova (ECTS) i brojačanog sistema.
5. Ocjenjivane unutar ECTS sistema obavlja se apsolutnom, odnosno relativnom raspodjelom prema ostvarenom konačnom uspjehu.

Član 2.

Ocjenjivanje unutar Evropskog sistema prenosa bodova

1. Uspjeh studenata za svaki predmet izražava se ECTS skalom ocjenjivanja u postocima od 0-100% pri čemu prolazna ocjena na dodiplomskom studiju iznosi 50% do 100%
2. Praćenje i ocjenjivanje studenata za svaki predmet obavlja se tokom nastave in a završnom ispitu kako slijedi:
 - Ukupan postotak uspješnosti studenata tokom nastave čini 0-70% ocjene.
 - Ukupan postotak uspješnosti studenata na završnom ispitu čini 0-30%
3. Konačna ocjena je zbroj postotaka ostvarenog tokom nastave i postotaka ostvarenog na završnom ispitu.

Član 3.

Način ocjenjivanja tokom nastave (0-70% ocjene)

1. Od 30% do 70% ocjene student može ostvariti preko kolokvija/međuispita (jednog ili više njih), u skladu sa studijskim programom predmeta koji polaže.
2. U zadnjoj sedmici nastave održavaju se popravni kolokviji na koji imaju pravo izlaska studenti koji nisu zadovoljili ili pristupili jednom od kolokvija.
3. Kolokvij se polaže u pisanom obliku na način kako je propisano polaganje pisanih završnih i popravnih ispita (član 6.)
4. Ako je programom predmeta predviđena provjera znanja pisanjem kolokvija, tada od 0 do 30 % ocjene tokom nastave nositelj predmeta sam raspoređuje i oglašava putem web stranice predmeta, a može koristiti različite oblike provjere znanja kao npr. pohađanje nastave, aktivnost u nastavi, seminarski rad, eksperimentalni rad, esej, istraživanje, projekat, referat, praktični rad, kritički prikaz, samostalni rad, rad na vježbama, domaća zadaća, terenski rad, test, seminarsko izlaganje, izrada programa, računalni program, timski zadatak, programiranje rada nastavnika.

Ukoliko programom predmeta nije predviđena provjera znanja pisanjem (izvođenjem) kolokvija/međuispita, tada 0 do 70 % ocjene tokom nastave nositelj predmeta sam raspoređuje i oglašava preko web stranice predmeta, a može koristiti prethodno navedene oblike provjere.

Član 4.

Način ocjenjivanja na pisanom završnom ispitu (0-30% ocjene)

1. Pisani završni ispit u pravilu je u obliku testa, a sadržaj precizira predmetni nastavnik na dodiplomskom studiju.
2. Studenti istog naraštaja/generacije, odnosno grupe pišu u redovnom ispitnom roku test koji ima isti sadržaj, odnosno složenost.
3. Ispit kandidat potpisuje svojim imenom i prezimenom, te brojem Indexa u za to predviđene rubrike u zaglavlju testa.
4. Ispit se piše u zadanom vremenu. Ako student prekorači to vrijeme ispit mu se ne priznaje i student će biti ocjenjen s 0% ocjene na završnom ispitu.
5. Pisani završni ispit se ocjenjuje na sljedeći način:

Broj tačnih rješenja	% ocjene
0-50% tačnih rješenja	0% ocjene
Svako naredno tačno rješenje nosi	Proporcionalni % ocjene
UKUPNO	% do 30% ocjene

Način ocjenjivanja na usmenom završnom ispitu (0%-30% ocjene)

1. Usmeni završni ispit sastoji se od najviše 10 pitanja na dodiplomskom studiju, na koja kandidat odgovara ili o kojima kandidat sa ispitivačem diskutuje kako bi ispitivač ostvario što bolji uvid u kandidatovo znanje. Pitanja se moraju ograničiti na gradivo unutar literature, u skladu sa studijskim programom predmeta koji se polaže.
2. Studenti istog naraštaja/generacije, grupe odgovaraju pred ispitivačem u grupama po pravilu ne većim od troje pristupnika.

3. Ispit je javan. U slučaju da je preostao ili se na redovni rok prijavio samo jedan student, ispit se ne može održati bez barem jednog svjedoka.
4. Ispitu mogu prisustvovati i članovi ispitne komisije.
5. Ispit se održava u zadanom vremenu. Ukoliko ispitivač prekorači to vrijeme student ima pravo odbiti odgovor na postavljeno pitanje.
6. Usmeni završni ispit se ocjenjuje na sljedeći način:

Broj tačnih odgovora	% ocjene
0-5 tačnih odgovora ili 0-50% tačnih odgovora	0% ocjene
Šesti i svaki naredni desetinski postotak (61-70%, 71-80% itd.) tačnih odgovora	+6% ocjene
UKUPNO	Do 30% ocjene

Način ocjenjivanja na praktičnom završnom ispitu (0%-30%)

1. Praktični završni ispit se sastoji od izvedbe nastavne aktivnosti, prezentacije umjetničkog rada, realizacije projekta i dr. u skladu sa studijskim programom predmeta koji se polaže.
2. Studenti istog naraštaja/generacije ili grupe izvode, prezentiraju praktični rad pojedinačno pred ispitivačem ili ispitnom komisijom.
3. Ispit je javan, te je stoga potrebno da ispitu prisustvuje bar jedan svjedok.
4. Ispit traje u predviđenom vremenu. Ako ispitivač prekorači to vrijeme student ima pravo odbiti daljnju saradnju.
5. Praktični završni ispit ocjenjuje se na sljedeći način:

Elementi vrednovanja	% ocjene
Priprema praktičnog rada	Do 5% ocjene
Izvođenje praktičnog rada	Do 5% ocjene
Stručnost	Do 5% ocjene
Komunikacijske kompetencije	Do 5% ocjene
Interakcijske kompetencije	Do 5% ocjene
Kreativnost	Do 5% ocjene
UKUPNO	Do 30% ocjene

Uvažavajući specifičnosti studijskih programa navedeni postotci se mogu drugačije odrediti kod pojedinih kolegija.

Član 5.

Način ocjenjivanja na popravnim ispitima u septembarskim rokovima

1. Pisani, usmeni i praktični popravni ispiti se polažu pod istim uslovima kao i završni ispiti u u redovnim rokovima.
2. Konačna ocjena se nakon pisanih, usmenih i praktičnih popravnih ispita formira na isti način.

Član 6.

Pravila ponašanja studenata na pisanom završnom ispitu

1. Izlazak na pisani završni ili popravni ispit student je obavezan prijaviti preko Studentske službe.
2. Za vrijeme pisanja pisanog ispita nije dozvoljeno: prepisivanje, razgovaranje ili okretanje, imati uključen mobitel, nepravovremeno predavanje testa nakon što je nastavnik dao znak da je vrijeme za pisanje testa isteklo, te predaja testa na način da nije okrenut na stranu na kojoj je vidljivo ime i prezime i broj Indexa studenta.
3. U svim navedenim slučajevima predmetni nastavnik neće razmatrati ispit, a student će dobiti 0% ocjene na završnim ispitima u redovnim rokovima i popravnim septembarskim rokovima.
4. Nakon isteka vremena za pisanje pisanog testa studentu više nije dopušteno bilo kakvo upisivanje u test.

Pravila ponašanja na usmenom završnom ispitu

1. Izlazak na usmeni završni ili popravni ispit student je obavezan prijaviti preko Studentske Službe.
2. Za vrijeme usmenog ispita nije dozvoljeno: dopisivanje, razgovaranje ili bilo kakva neverbalna komunikacija među pristupnicima, bilo kakvo iščitavanje skripti ili drugih vizualnih nosača informacija o postavljenom pitanju, imati uključen mobitel ili kakav drugi nosač informacija o postavljenom pitanju.
3. U svim navedenim slučajevima ispitivač je dužan prekinuti ispit, a kandidat će dobiti 0% ocjene na završnim ispitima u redovnim rokovima i popravnim ispitima u septembarskim rokovima.
4. Nakon isteka vremena za usmeni ispit student ima pravo odbiti daljnju saradnju ukoliko Ispitivač ustrajava u daljnjem razgovoru.

Pravila ponašanja studenata na praktičnom završnom ispitu

1. Izlazak na praktični završni ili popravni ispit student je obavezan prijaviti preko Studentske službe.
2. Za vrijeme izvođenja praktičnog ispita nije dozvoljeno: pristupiti izvođenju/prezentaciji praktičnog dijela ispita bez konsultacije sa mentorom/mentorima, pristupiti izvođenju/prezentaciji praktičnog dijela ispita bez odgovarajuće pripreme, ne poštivati pravila struke u izvođenju.
3. U svim navedenim slučajevima ispitivač je dužan prekinuti ispit, a kandidat će dobiti 0% ocjene.
4. Nakon isteka vremena za praktični ispit student ima pravo odbiti daljnju saradnju ukoliko ispitivač ustrajava u daljnjem ispitivanju.

Član 7. Ispitni rokovi

1. Završni ispit:

- student ostvaruju pravo na dva redovna roka završnog ispita.

2. Popravni ispit:

- studenti ostvaruju pravo na dva popravna ispita,
- o dodatnom/vanrednom ispitnom roku za popravni ispit odlučuju u dogovoru sa dekanom.

Član 8. Ocjenjivanje u odnosu na naraštaj/generaciju ili grupu

1. Raspoređivanje se obavlja na temelju konačnog postignuća (zbroj ECTS ocjene ostvarene tokom nastave i na završnom ispitu) kako slijedi:

- A- 91 do 100 % ocjene,
- B- 81 do 90% ocjene,
- C- 71 do 80% ocjene
- D- 61 do 70% ocjene
- E- 55 do 60% ocjene
- F- manje od 55% ocjene.

2. Brojčano ocjenjivanje studenata u svim studijskim grupama obavlja se na temelju konačnog postignuća (zbroj ECTS ocjene ostvarene tokom nastave in a završnom ispitu) kako slijedi:

- Ocjena odličan (10) odgovara ocjeni A u ljestvici ECTS,
- Ocjena iznad prosjeka (9) odgovara ocjeni B u ljestvici ECTS,
- Ocjena prosječan (8) odgovara ocjeni C u ljestvici ECTS,
- Ocjena uopšte dobar (7) odgovara ocjeni D u ljestvici ECTS
- Ocjena dovoljan (6) odgovara ocjeni E u ljestvici ECTS,
- Ocjena ne zadovoljava (5) odgovara ocjeni F u ljestvici ECTS.

3. Za predmete za koje je studijskim programom utvrđeno da se iskazuju opisnom ocjenom, nastavnik dodjeljuje ocjenu zadovoljio student koji ostvari 50% i više obaveza na dodiplomskom studiju.

4. U index i prijavnicu unosi se uz potpis ispitivača/predmetnog nastavnika brojčana ocjena, ECTS ocjena i postotak usvojenog znanja, vještina i kompetencija te datum polaganja ispita.

Član 9.

Rang liste

1. Rang lista se formira za grupu studenata koju čine svi student koji su, nakon završnog

ispita, ostvarili 50% i više na dodiplomskom studiju.

2. Na dodiplomskom studiju formiraju se rang liste za sljedeće grupe studenata:
 - redovni studij
 - vanredni studij
3. Rang lista sa ostvarenim ukupnim % znanja, vještina i kompetencija, te ECTS i brojčanom ocjenom objavljuje se u roku od 7 dana nakon održanog završnog ispita za svaki predmet (za svaku godinu Senat Visoke škole određuje visinu procenta za upis na redovne i vanredne studije).

Član 10.

Obaveze nositelja predmeta

1. Nositelj predmeta s individualnom nastavom obavezan je voditi evidenciju za svakog studenta o postignutom procentu vještina, kompetencija i znanja za svaki segment ocjenjivanja i % konačne ocjene te takvu evidenciju javno oglasiti putem oglasne table, web stranice i mora biti prisutan u silabusu predmeta.
2. Nositelj predmeta dužan je ocjeniti studenta ECTS ljestvicom (0-100%), ECTS ocjenom i brojčanom ocjenom.
3. Nakon obavljenog ocjenjivanja studenta tokom nastave i provedenog završnog ispita nositelj predmeta je dužan utvrditi ukupan broj ostvarenih % ocjene za svakog studenta iz skupine i formirati konačnu rang list studenata prema ostvarenim % ocjene.
4. Nositelj predmeta obavezan je na zahtjev studenta pružiti mu uvid u postignuti % vještina, kompetencija i znanja za svaki segment ocjenjivanja.
5. Ako se broj studenata ne može razvrstati zbog jednakog iznosa % konačne ocjene, prednost će ostvariti student koji je ostvario viši % ocjene na završnom ispitu, a zatim onaj koji ima viši zbirni procenat ocjene na kolokvijima.
6. Nositelj predmeta obavezan je studente upoznati sa načinom postotnog ocjenjivanja za sve vrste provjere usvojenih znanja, vještina i kompetencija i načinu formiranja konačne ocjene.

Član 11.

Ukupan uspjeh

1. Prosjek svih ostvarenih ocjena (prosječna ocjena) utvrđuje se tako da se umnožci % ocjene i ECTS bodova svakog predmeta saberu, a zatim podijele ukupnim brojem ECTS bodova studija (180/240 ECTS boda za dodiplomski studij). Konačni rezultat zaokružuje se na dvije decimale. To je moguće iskazati u dodatku diploma jedino ako su svi predmeti iskazani ECTS % ljestvicom ocjenjivanja.
2. Na temelju prosječnog % usvojenosti znanja, vještina i kompetencija na kraju dodiplomskog studija iskazuje se konačni prosjek usvojenosti znanja, vještina i

kompetencija studenata iz svih položenih predmeta putem jedinstvene sveobuhvatne klasifikacije kvalifikacije (klasifikacije časti).

- Prvi razred (First Class Honours) – 91-100% usvojenog znanja, vještina i kompetencija studenata tokom studija;
- Drugi gornji razred (Upper Second Class Honours) – 81-90% usvojenog znanja,
- Drugi donji razred (Lower Second Class Honours) – 71-80% usvojenog znanja, vještina i kompetencija studenata tokom studija;
- Treći razred (Third Class Honours) – 61-70% usvojenog znanja, vještina i kompetencija studenata tokom studija;
- Položio (Pass) – 55-60% usvojenog znanja, vještina i kompetencija studenata tokom studija.

3. Studenti sa najvećim konačnim prosjekom usvojenog znanja, vještina i kompetencija tokom studija; na kraju dodiplomskog studija na svjedodžbi, odnosno diploma, naznačuje se pohvala iz latinske klasifikacije pohvala:

- Diplomirani student sa najvećom pohvalom
(SUMMA CUM LAUDE Bachelor)
- Diplomirani student sa velikom pohvalom
(MAGNA CUM LAUDE Bachelor)
- Diplomirani student sa pohvalom
(CUM LAUDE Bachelor)

4. Broj pohvaljenih studenata utvrđuje Senat Visoke škole.

Član 12.

Stupanje na snagu i primjena

Ovaj Pravilnik stupa na snagu osmog dana od dana objavljivanja na oglasnoj table Visoke škole. Prilikom vrednovanja i ocjenjivanja rada studenata sa posebnim potrebama odredbe ovog Pravilnika mogu se adekvatno prilagoditi njihovim potrebama.

Konjic, 16.02.2015.

Broj: S-7/15

Dekan

Doc.dr Marijana Šećibović
